



## STINAPA TA INFORMA

### KI TA KEDA PA NOS MES?

Lucia 'Mientje' Martina i su negoshi 'Kushina Krioyo'. Ken no ta kòrd'é? E mama kasá ku dos yu aki a baha man un tiki ku su kushinamentu. Pero ainda gusta anda ku kliente lokal i turista. Den un konosido pakus na airopuerto e ta sirbiendo nos tur ku entre otro souvernirs i revistanan lokal i internashonal. E ta di akuerdo ku e laman di Boneiru ta limpi, masha bunita i puru. Pero su wowonan ta literalmente bria ora e menshoná kunuku di su mama komo su lugá mas gustá. Ku smak e ta kontá di su temporada komo mucha. Kon nan tabata buska awa na pos i kana ku e blekinan na man i riba kabes. Ainda e ta bishitá ku frekuensha kunuku di su mayornan pa e por relahá. E ta deskribí e bientu fresku i e zonidonan típikamente di kunuku. Manera paranan ku ta kanta. Su tata tabata planta ántes tur sorto di berdura i fruta manera patia, pampuna i maishi. No tin igual na e galiña i kabritu krioyo. Sigur si bo kompará nan ku esunnan di lugánan djafó. Nos ta gusta gaba lokual ta di otro pais miéntras ku nos kuminda plantá òf kriá aki ta sin hormona i yen di smak. Mientje no ker biba pa nada di mundu otro kaminda ku no ta na Boneiru. E ta haña nos naturalesa asina úniko. Manera e mes ta deskribié: "E 'dushi' di Boneiru bo no ta topa ningun kaminda!" Hopi turista ku e kombersá kuné durante su trabou ta bis'é ku nos naturalesa ta duna asina tantu trankilidat. "I love this place" ta e frase kontínuo ku e ta keda tende kada biaha. Pensativo pero desidido Mientje ta drei mesora i puntra su mes: "Si nan mes ta pensa i sinti asina, ta ki ta keda pa nos mes?"  
*Skirbí pa Natalie Wanga.*

Pa mas informashon i reakshon: STINAPA, telefon 717 - 8444, [info@stinapa.org](mailto:info@stinapa.org)

## NOS TA BIBA DI NATURALESA



**Traha huntu na un desaroyo duradero pa Boneiru**